



Broj: UP1-05/A-07-7-KT-4-4/25
Sarajevo, 10.12.2025. godine

Na osnovu člana 60. Zakona o upravnom postupku („Službeni glasnik BiH“, br. 29/02, 12/04, 88/07, 93/09, 41/13 i 53/16) i člana 25. stav (3) Zakona o slobodi pristupa informacijama na nivou institucija Bosne i Hercegovine („Službeni glasnik BiH“, broj 61/23), rješavajući po pismenom zahtjevu br. UP1-05-07-7-4/25 od 28.11.2025. godine i UP1-05-07-7-4-3/25 od 04.12.2025. godine, direktorica Direkcije za evropske integracije donosi

ZAKLJUČAK **o odbacivanju zahtjeva za pristup informacijama**

Odbacuje se zahtjev za pristup informacijama od 28.11.2025. godine, koji je putem mail-a podnijela V. F, protokolisan pod brojem: UP1-05/A-07-7-4/25 i ispravljeni zahtjev broj: UP1-05/A-07-7-KT-4-3/25 od 04.12.2025. godine, **kao neuredan**.

Obrazloženje

Direkcija za evropske integracije zaprimila je dana 28.11.2025. godine, putem mail-a, zahtjev Vedrane Faladžić, u kojem traži da joj se, u skladu sa članom 23. Zakona o slobodi pristupa informacijama na nivou institucija Bosne i Hercegovine („Službeni glasnik BiH“, broj 61/23) (u daljem tekstu: Zakon o slobodi pristupa informacijama), dostave podaci o državnim službenicima u Direkciji za evropske integracije koji su od 2020. godine do danas ostvarili pravo za napredovanje u viši platni razred po osnovu Metodologije za raspoređivanje zaposlenog unutar platnog razreda, a na osnovu sticanja jednog višeg stepena stručnih ili naučnih zvanja iz oblasti koja potpada pod osnovnu djelatnost institucije Bosne i Hercegovine – konkretno ekvivalencije diplome. Podaci koji su traženi zahtjevom su: ime i prezime zaposlenika, naziv radnog mjesta zaposlenog, datum rješenja kojim je odobreno pomjeranje unutar platnog razreda i datum uvjerenja o ekvivalenciji.

Razmatrajući predmetni zahtjev, utvrđeno je da je isti nepotpun i nerazumljiv, s obzirom da Metodologija za raspoređivanje zaposlenog unutar platnog razreda, na čijoj osnovi imenovana zasniva svoj zahtjev za pristup informacijama, ne reguliše napredovanje zaposlenog u viši platni razred. Naime, Metodologijom za raspoređivanje zaposlenog unutar platnog razreda („Službeni glasnik BiH“, br. 6/12 i 76/20) utvrđen je način i postupak raspoređivanja zaposlenog u instituciji Bosne i Hercegovine u unutrašnji platni razred, dok je napredovanje u viši platni razred, regulisano Zakonom o državnoj službi u institucijama Bosne i Hercegovine, Zakonom o radu u institucijama Bosne i Hercegovine i podzakonskim aktima koji regulišu ovu oblast, utvrđeno isključivo kao posljedica napredovanja na više radno mjesto nakon okončanja javnog ili internog oglasa.

S tim u vezi, s obzirom da iz predmetnog zahtjeva nije bilo jasno i precizno da li imenovana traži podatke o napredovanju zaposlenog u viši platni razred ili u viši unutrašnji platni razred, Direkcija za evropske integracije je u skladu sa članom 25. stav (2) Zakona o slobodi pristupa informacijama, dana 04.12.2025. godine, dostavila imenovanoj Poziv za ispravku zahtjeva za pristup informacijama broj: UP-1-05/A-07-7-KT-4-2/25, kojim je pozvana da u roku od pet dana od dana dostavljanja poziva, ispravi svoj zahtjev jer je isti nepotpun i nerazumljiv.

Dana 04.12.2025. godine, imenovana je putem mail-a, dostavila ispravljen zahtjev za pristup informacijama, protokolisan pod brojem: UP1-05/A-07-7-4-3/25, u kojem i dalje traži da joj se dostave podaci o državnim službenicima u Direkciji za evropske integracije koji su ostvarili pravo za napredovanje u viši platni razred po osnovu Metodologije za raspoređivanje zaposlenog unutar platnog razreda (br. 16/12 i 76/20), konkretno na osnovu sticanja jednog višeg stepena stručnih ili naučnih zvanja iz oblasti koja potpada pod osnovnu djelatnost institucije Bosne i Hercegovine i to

od 2020. godine do danas. Osim toga, u ispravljenom zahtjevu, u odnosu na prvobitni zahtjev, prošireni su podaci koje imenovana traži i to: ime i prezime državnog službenika, podaci o kojim se akademskim titulama radi i o kojem ciklusu (prvi, drugi, treći) visokog obrazovanja, a u skladu sa Okvirnim zakonom o Visokom obrazovanju, datum rješenja kojim je odobreno pomjeranje unutar platnog razreda, datum sticanja višeg zvanja i po kom programu, da li je i ko (imenom i prezimenom) od državnih službenika dobio rješenje o unapređenju u viši platni razred na osnovu ekvivalencije diplome i ako jeste, datum uvjerenja o ekvivalenciji diplome.

Razmatrajući sadržaj ispravljenog zahtjeva, utvrđeno je da imenovana ponovo na isti način definiše pravni osnov za dostavljanje traženih podataka, odnosno i dalje navodi viši platni razred, zbog čega se konstatuje da je ispravljeni zahtjev i dalje nepotpun i nerazumljiv, odnosno da prvobitni zahtjev nije ispravljen na odgovarajući način, na osnovu kojeg se sa sigurnošću može utvrditi o kojoj traženoj informaciji je riječ. S tim u vezi, kako je imenovana ispravljeni zahtjev proširila sa novom vrstom i većim obimom traženih podataka, isti se nije razmatrao kao novi zahtjev za pristup informacijama, jer je isti i dalje nepotpun i nerazumljiv, zbog čega se ne može sa sigurnošću utvrditi o kojoj traženoj informaciji je riječ.

Članom 25. stav (3) Zakona o slobodi pristupa informacijama, utvrđeno je da ukoliko podnosilac zahtjeva ne ispravi zahtjev na odgovarajući način, a na osnovu dostavljenog se ne može sa sigurnošću utvrditi o kojoj traženoj informaciji je riječ, institucija Bosne i Hercegovine će zaključkom odbaciti zahtjev kao neuredan.

Slijedom svega gore navedenog, primjenom navedene zakonske odredbe, donijet je Zaključak kao u dispozitivu.

Pouka o pravnom lijeku: Protiv ovog Zaključka podnositeljica zahtjeva može izjaviti žalbu Žalbenom vijeću pri Vijeću ministara Bosne i Hercegovine (adresa: Trg BiH broj 1, Sarajevo), u roku od 15 dana od dana prijema ovog Zaključka uz prethodnu uplatu administrativne takse u skladu sa Zakonom o administrativnim taksama, u iznosu od 10,00 KM po tarifnom broju 2.

DIREKTORICA

Elvira Habota

Dostavljeno:

1. Podnositeljici zahtjeva
2. Službenici za informisanje
3. a/a